

Mál nr. 9/2013

Ár 2013, mánudaginn 25. nóvember var haldinn fundur í siðanefnd HRFÍ að Síðumúla 15, Reykjavík.

Fyrir var tekið mál nr. 9/2013

HRFÍ

gegn

X

og kveðinn upp svohljóðandi úrskurður:

I Málsmæðferð siðanefndar

Í erindi kæranda (HRFÍ) dagsettu 10. maí 2013 er farið fram á úrskurð siðanefndar vegna þess að kærða (X) hafi gerst brotleg við grundvallarreglur fyrir félagsmenn HRFÍ með því að para tíkina Z með rakkannum Y þar sem tíkin var of gömul fyrir fyrsta got. Kæran var send kærðu til umsagnar með bréfi dagsettu 4. júní 2013 og henni gefinn andmælafrestur til 2. júlí. Siðanend hefur mótttekið svarbréf kærðu dags. 1. júlí og sent afrit af því til kæranda til umsagnar. Kærandi svaraði ekki efnislega en óskaði eftir því að haldið yrði áfram með málið. Siðanefnd telur að öll gögn er máli skipta hafi komið fram í málinu og því ákveðið að taka málið til úrskurðar.

II. Helstu málsatvik og ágreiningsefni

Samkvæmt innsendu pörunarvottorði var tíkin Z pöruð við rakkann Y hinn 26-27 júní 2012. Hundarnir eru af kyninu Íslenskur fjárhundur og er tíkin í eigu kærðu. Við pörunina var tíkin of gömul þar eð þetta var fyrsta pörun hjá henni. Kærandi telur að með pöruninni hafi kærða brotið gegn grundvallarreglum fyrir félagsmenn HRFÍ. Í andsvari sínu svaraði kærða því til að tíkin hefði verið pöruð aðeins tveimur mánuðum eftir 7 ára aldur og bæði kærða og eigandi undaneldishunds hefðu talið að tíkin væri í mjög góðu líkamlegu ástandi. Þá kemur það fram í meðfylgjandi vottorði dýralæknis að hann hafi metið það svo að tíkin væri í góðu líkamlegu ástandi til að eignast hvolpa. Pörunin hafi verið fyrirhuguð í þeim tilgangi að viðhalda genabreidd innan stofnsins okkar á Íslandi en tíkin er eini afkomandi innflutts föður frá Danmörku.

III. Forsendur

Samkvæmt grundvallarreglum fyrir félagsmenn í HRFÍ skulu félagsmenn er nota hunda sína til ræktunar vera trúir ræktunarstefnu HRFÍ og vera vel að sér um það ræktunarmarkið sem gildir fyrir viðkomandi hundakyn og í grundvallarreglum fyrir félagsmenn HRFÍ segir:

„3.5. Ef tík er pöruð eftir 7 ára aldur skal fylgja pörunarvottorði vottorð frá dýralækni, sem vottar að tíkin hafi verið í líkamlega góðu ástandi fyrir pörun og geti gengið með hvolpa og alið önn fyrir þeim án þess að það komi niður á heilsu hennar. Para ekki tík sem er orðin 7 ára gömul hafi hún ekki átt hvolpa áður.”

Óumdeilt er að á þeim tíma sem pörun fór fram hinn 26-7. júní 2012 var tíkin orðin 7 ára gömul og 71-72 dögum betur og var þetta hennar fyrsta pörun. Samkvæmt grundvallarreglum

fyrir félagsmenn HRFÍ skal ekki para tók eftir 7 ára aldur hafi hún ekki átt hvolpa áður og hefur kærða því gerst brotleg við grein 3.5 í grundvallarreglum fyrir félagsmenn í HRFÍ.

Kemur þá til skoðunar hver séu hæfileg viðurlög við brotinu. Það var ásetningur kærðu að para tókina á þessum tíma og gaf hún þá skýringu að tókin lóðaði aðeins einu sinni á ári og aðeins þessi eina pörun væri fyrirhuguð fyrir hana. Þá hafi verið mikilvægt að rækta frá henni þar sem hún er eini afkomandi innflutts föður frá Danmörku. Siðanefnd bendir á að grundvallarreglurnar eru settar með velferð og heilbrigði hundanna að leiðarljósi og það er ekki tilviljun hvar aldursmörk og önnur viðmið eru sett. Þessar reglur eiga góðir ræktendur að virða skilyrðislaust og haga pörunum hunda sinna þannig að ekki komi til að reglurnar verði brotnar. Telur siðanefnd vera hæfilega refsingu að beita áminningu.

IV Niðurstaða

Kærða X telst hafa gerst brotleg við grein 3.5 í grundvallarreglum fyrir félagsmenn í HRFÍ

Kærða er áminnt

f.h. siðanefndar

Guðríður Valgeirsdóttir

Hilmar Sigurgíslason

Kristín Sveinbjarnardóttir